

Zweeloo, 4 augustus 2024

Zingen an het begun: Lied 216 (vert. Renate Bolhuis)

1. Dit is een mörgen as ooit de eerste,
zingende veugels geeft oes die deur.
Daank veur het zingen, daank veur de mörgen,
albei ontspringt er nei an het woord.

2. Dauw op de èerde, zunlocht van boven,
vochtige hof die rök net as toen.
Daank veur gewas, veur gres en veur bomen,
al wel hier kuiert, wet: het is goed.

3. Dag van mien leven, locht veur mien ogen,
locht dat ooit speulde waor Eden lag.
Daank alle mörgens Gods neie schepping,
daank ingeteugen Gods neie dag.

Bemoedigen en groeten

Bidden an het begun

Zingen: Psalm 65:1 en 2 (vert. Jans Kuik)

1. Het past oes Dij te priezen, Here
op dien verheven stee.
Wij wilt oes dan hen Sion keren;
geloften lös wij in.
Daorhen möt ieder mèens zuk wenden,
die vast lop met zien schuld,
tot Dij, oes redder oet d'ellende,
die al oes kwaod verhult.

2. Zalig, wel deur Dij oetverkeuzen,
ingaon mag in dien hof;
in hum komp deel dien gunst en wezen,
hij hef veul priezensstof.
Wij wordt deur Dij nog begenaodigd,
die's hillig bis en goed,
Dij, die's oes in dien hoes verzaodigs
met spies' in overvloed.

Bidden veur de nood van de wereld

Zingen: Lied 304 (Vert. Lia Evers)

1 Zing van de Vader die in het begun al
de mèenschen muuk, de dieren en de dingen,
hemel en èerde moet zien naam bezingen:
hol Hun in ère!

2 Zing van de Zeun, het locht veur oeze ogen,
bron van geluk veur wel Hum wil geleuven,
luuster naor Hum het woord zo wied van boven:
hol Hum in ère!

3. Zing van de Giest, de aosem van het leven,
 blievende kracht de mèenschenkinder geven.
 Waor wij maor gaot, wij huuft niet bang te wezen:
 hol Hum in ère!

Bidden

Schriftlezings:

Deuteronomium 10:12-21 (vert. JLN)

¹²Israël, de HEER, joen God, vrag niks anders van joe as het volgende: zien naam hoog holden, de weg gaon die hij je wes, slim wies met hum weden en hum dienen met hiel joen hart en hiel joen wezen. ¹³Hold joe an zien regels en veurschriften die a'k joe die vandaag geef, dan giet het je goed. ¹⁴Want wis, an de HEER joen God heurt de hemel, ja de allerhoogste hemel en de èerde met alles wat daarop leeft. ¹⁵Allén met joen veuolden hef de HEER een verbond angaon wild. Hij much heur slim geern lieden en daorum hef hij joe, heur naozaten, uutkeuzen uut alle volken tot vandaag an toe. ¹⁶Besnied daorum de veurhuud van joen hart en wees niet langer zo stiefkoppig. ¹⁷Want de HEER, joen God, is de hoogste God en heer. Hij is de grote, de machtige; heb ontzag veur hum. Hij kek gieniene naor de ogen en lat zuch niet umkopen. ¹⁸Hij döt de wees en de wedevrouw recht en is liefdevol veur vrunden, heur gef hij stoet en kleren. ¹⁹Daorum moet ok ie vrunden met liefde behandeln, ie bint ja zölf vrunden west in Egypte. ²⁰Heb groot ontzag veur de HEER, joen God, dien hum en doe wat hij wil. Leg allén de eed af bij het anroepen van zien naam. ²¹Pries hum. Hij is joen God. Hij hef grote indrukwekkende dingen daon die aj met eigen ogen zien hebt.

Zingen: Lied 320:1, 2 en 3 (Vert. Hans Katerberg)

1 Wel oren um te heuren hef,
 heurt naor de wet, die God hum gef:
 ie zult gien vrömde goden
 maor mij allien anbidden aaltied.
 Heurt, Isrel, mien geboden.

2 Hebt lief je Heer, nou en aaltied,
 dient Hum aaltieding, wied en zied,
 anbidt Hum in je daoden.
 Dit is het eerste – en grote- gebod
 de wil van God, de Vaoder.

3 Zörgt veur je naost' as veur jezölf,
 geef hum te eten, les zien dörst,
 een woonstee moej hum geven.
 Het tweede gebod is het eerste geliek,
 doet dit en ie zult leven.

Marcus 7:1-23 (Vert. Max Douwes)

¹Doe toogden de Farizeeën en paartie biebelkenners, wel as oet Jeruzalem heerkommen waren, te hoop op hum af. ²Zie zagen dat paartie van zien discipeln stoet aten met niet zindelijke haanden, dat wil zeggen dat zij die niet eerst waskerd hadden. ³Want de Farizeeën en alle Jeuden eet ja nooit, of ziet möt eerst, naor het gebroek wat as van older op older veurschreven is, de handen goed waskerd hebben, ⁴en zie eet niks van de markt,

of zie hebt zuch eerst waskerd, en nog een hiele koppel dinger meer bint er, waor as ze zuch an holdt, naor het gebroek dat van older op older veurschreven is, bijveurbiedt het umwaskern van drinkbekers en kannen en kopern vaatwark. ⁵De Farizeeën en biebelkenners vreugen hum zodoende: 'Waorum holdt dien discipeln zuch niet an het gebroek wat as van older op older veurschreven is, en eet brood met haanden die niet zindelijk bint?' ⁶Maor hij zee tegen heur: 'Jesaja had geliek doe hij van huichelaars veurzee wat as schreven stiet: dit volk eert mij met de mond, maor heur hart is wied van mij vort. Zij eert mij vergeefs, ⁷umdat zie lerings veurstelt, wel as menselijke veurschriften bint.

⁸IJ holdt je niet an God zien gebod, maor um te meer an het gebroek under mensken.'

⁹Wieder zee hij tegen heur: 'Het stiet je mooi um God zien gebod opzied te zetten um je veurschriften op streek te holden. ¹⁰Want Mozes hef zegd: "Heb eerbied veur je va en moe," en ok: "Wel as zien vao of moe vervluukt, dennende mut starven." ¹¹Maor ij verklaort: "Wel as tegen zien va of moe zeg van 'korban', dat wil zeggen: offergaove, dat is alles waoras ik je met helpen kan, ¹²dan mag zonnende van je niks meer veur zien vao of moe doen. ¹³En zo haalt ij de kracht oet God zien woord deur die veurschriften van je, an wel as ij in je lering vastholdt. En dit soort dinger doet ij bij hopen.'

¹⁴Doe ruup hij het volk weer bij hum en zee het: 'Heur toe en verstao mij wal: ¹⁵niks wat as van boeten of toe de mensk oetkomp, dat mak hum smerig. ¹⁶As men oren hef um te heuren, laot men dan ok lustern.'¹⁷Doe hij nou bij het volk vortgaon en thoekommen was, doe vruugen zien discipeln hum naor de verklaoring van de geliekenis. ¹⁸En hij zee tegen heur: 'Hebt ij dan ok nog gien inzicht? Begriepst ij dan niet dat alles wat as van boeten of toe de mensk inkomp, hum niet smerig maken kan? ¹⁹Want dat komp niet in zien hart maor in zien boek terecht, en het wordt oet een zekere plaots weer vallen laoten.' Dusdoende verklaorde hij alle eterij zindelijk. ²⁰En hij zee: 'Wat as toe de mensk oetkomp, dat maakt de mensk smerig. ²¹Want van binnen, toe 't hart van de mensken oet, daar komt de kwaolie gedachten vort: lösbaandigheid met vrouwlu, stelen, moord, ²²toehouden met 'n aander, gierigheid, kwaoiigheid, bedriegerij, geiligheid, ofguunst, vluken, verwaondheid, dommigheid. ²³Al die kwaolie dinger komt van binnen toe de mensk oet en dat maakt hum smerig.'

Zingen: Lied 320:4 en5

4 De liefdemacht, die is zo groot,
gien water blust heur vuren oet,
die daordeur bint ontsteuken.
Nou wilt ontbraanden- an 't liefdewoord;
God hef het tot oes spreuken.

5 De liefde hef zien iegen taol,
alle kwaod bedekt zie doezendmaol –
vergef al wel je zèer dee.
Dit lied zal in de wind verwèeien maor
geef liefde in oes een vaste stee.

Preek

Zingen: Lied 316 (Vert. Janny Alberts-Hofman)

1. God gef oes heden zien gebod. '
t Is niet te hoog, 't is niet wied vort;
wij huuft 't niet oet de hemel halen.
Hij hef het niet verstoppt veur oes:
't lig hiel dichtbij in iegen hoese;
Hij lat 't in oeze harten dalen.

2. Het lig niet an de overkaant.
 Hij leg het oes in iegen haand
 um het te doen en 't zal gebeuren.
 Het woord van vrede en van recht
 hef Hij in oeze monden legd.
 Hij lat 't in zien geboden heuren.

3. Hij gef an oes de vrije daod
 te kiezen tussen goed en kwaod
 en lat an oes de dood of 't leven.
 As wij getrouw blieft an de Heer,
 zul wij het laand bewonen; wèer
 zal God ok daar zien zegen geven.

Bidden

Wij besluit oes bidden met woorden van de Here Jezus., die elk hardop metzeggen kan:

Vaoder in de hemel! Laot dien naam hilligd worden,
 laot dien keuninkriek kommen,
 laot dien wil gebeuren op de èerde net as in de hemel.
 Geef oes vandaag oes daaglijks brood en vergeef oes oeze schulde,
 zoas wij vergeeft wel bij oes in de schuld staot.
 En breng oes niet in verleiding,
 maor verlös oes van de kwaoie macht.
 Want dienende is het keuninkriek
 en de kracht en de hèerlijkheid
 in der ieuwigheid.
 Amen.

Met de buul rond

Zingen: Gao nou op pad (melodie lied 868, Vert. Alja Streutker-Betting)

1. Gao nou op pad en laot hoop en verwachting je leiden,
 ok al bint pien en verdriet deur gien mèensch te vermijden.
 Heb maor gien angst!
 Gao en vertrouw op de Giest,
 die je daarvan zal bevrijden.

2. Gao nou op pad en tref onderweg aandere mèenschen.
 Geef dan an elk alles wat je jezölf zulden wèensen.
 Dan under 't gaon
 zuuk ie de steun van de Naom,
 gaoj as vanzölf over grèenzen.

3. Gao nou op pad en laot achter je twiefels en zörgen.
 Gao en ontdek wat vandaog nog veur je is verbörge.
 Hol op het Licht
 aaldeur je ogen dan richt,
 dat zal je kracht weden veur mörgen.

Zegen